

金
石
錄

五

二廢作二

金石錄卷第二十八

跋尾十八

唐

唐嚴浚碑

唐郭英乂碑

唐潘孝子碑

唐萬年縣令徐昕碑

唐富平尉顏喬卿碣

唐贈太尉李愬碑

唐麻姑仙壇記

唐涼國夫人李氏碑

唐呂府君敕葬碑

唐高陵令李岷遺愛碑頌

唐宋璟碑

唐宋廣平碑側記

唐放生池碑陰記

唐滑臺新驛記

唐右僕射裴遵慶碑

唐杜濟墓誌

唐重模延陵季子墓刻

唐顏勤礼碑

唐顏默殘碑

唐開元寺僧殘碑

唐顏魯公與郭僕射書

唐元結碑

唐張九齡碑

唐右神武將軍史繼先墓誌

唐三藏和尚不空碑

唐內侍監魚朝恩碑

唐康日知墓誌

唐工部尚書辛京杲碑

唐茶山詩并詩述

唐崔綜謝廣利方表

唐嚴浚碑

右唐嚴浚碑徐浩書題禮部尚書襄開國子席某撰而陽縣其名殘缺不可辨按天室中席豫嘗為此官而碑末有云豫平生交好知其為席豫撰也唐書列傳云浚華州華陰人而碑言馮翊臨晉人碑文字剝落所存無幾惟其首大字十二尚完好筆法奇偉可愛云

唐郭英乂碑

右唐郭英乂碑元載撰按唐書百官志開元中增集賢待制官至永泰時勳呂罷節制無職事皆待制于集賢

門凡十三人今此碑載英又永泰元年實錄此藏余觀
常述所撰集賢注記開元天寶間凡隸名于集賢者皆
一時文學之選蓋官以待制之為名所以脩人主顧問
言語侍從之臣也今乃以武夫庸人參于其間可乎代
宗之政其紀綱廢弛者多矣豈特以此而已哉

唐潘孝子頌

右唐潘孝頌子崔稱撰孝子字季通與其父良瑗相繼有
至行親喪皆廬墓大曆中宣尉使李季卿以聞有詔褒
美墳隤在今中年縣祥符中章聖皇帝西祀汾陰過之
詔有司封其墓且禁樵採云

唐萬年縣令徐昕碑

右唐徐昕碑韓雲卿撰碑云昕為并州錄事參軍相國
姚元之為法曹笞部人部人誣狀反上天后臨朝方樹
刑威詔公見假風憲然後按詰公表直元之則天大怒
將貶鼎鑊終能犯顏曉辨正刑而出果如雲卿所書昕
可謂賢矣而唐史不載其事因為錄之昕者有功從弟
其忠厚之性固宜異于他人也

唐富平尉顏喬卿碣

右唐顏喬卿碣在長安世顏罕傳或云其石今亡矣有
朝士劉鐸如者汶陽人家藏漢唐石刻四百卷以余集

錄闕此喝也輒以見贈宣和癸卯中秋在東萊重易裝
標因為識之

唐贈太尉李愬碑

右唐李愬碑李紆撰歐陽公集古錄云新唐書列傳載
愬十餘子江渢涵瀛等同被害惟源彭免按李紆載愬
子見于碑者十二人未嘗有源也然則源者史家何從
得見之按史言源為司農主簿以碑考之源當為汶余
按穆宗寔錄載源事首尾甚詳云愬被害源方八歲為
賊所虜流浪南北展轉人家凡七八年洛陽平父之故
吏以金帛贖之歸于近親代宗聞之授河南府叅軍自

司農主簿桑官寓居洛陽惠林佛寺垂五十年至長慶
中御史中丞李德裕表薦拜諫議大夫時八十年餘矣
竟辭不受又李德裕會昌一品集載薦源表其事皆同
然則史不為無拠蓋疑其初名汶後改為源耳又唐人
袁郊撰甘澤謠載源隱居拜官皆同惟書僧表澤事頗
恠誕難信然至其名亦不應謬誤也

唐麻姑仙壇記

右唐麻姑仙壇記顏魯公撰并書在撫州又有一本字
絕小世亦以為魯公書驗其筆法殊不類故正字陳無
已謂余嘗見黃魯直言乃慶曆中一學佛者所書魯直

猶能道其姓名無已不能記也小字本今錄于後使覽者詳其真偽云

唐源國夫人李氏碑

右唐源國夫人李氏碑李郭子儀夫人也碑韓雲卿撰史惟則八分書并篆額文詞頗簡古而字畫工妙可喜或云碑今亡矣故世罕傳雲卿乃退之叔父科斗書後記所謂大曆中以文詞獨行中朝者

唐呂府君敕葬碑

右唐呂府君敕葬碑呂府君者名惠恭僧大濟之父代宗朝元載王縉用事宗尚浮屠之法大濟為帝常修功

德使殿中監故褒贈其父為兗州刺史官為營辦葬事
爵賞之濫一至于此

唐高陵李峴遺愛頌

右唐李峴遺愛頌峴嘗任高陵縣令後為宰相以致
後縣令蘓端刻此頌焉碑云曾祖恪封吳王祖崑嗣吳
王父禕信安郡王元和姓纂所載亦同而唐書列傳以
為恪之孫誤矣

唐宋璟碑

右唐宋璟碑顏真卿撰并書唐書廣平六子曰昇尚渾
恕華衡今此碑言公有七子曰復昇尚渾恕延華衡乃

八子也魯公所撰廣平碑側記亦曰公之第八子衡謫
官沙州蓋廣平寔有八子唐闕書復延二人而此碑魯公
誤書八字為七尔又碑云廣平自吏部侍郎兼攝尚書
左丞而史不載後自楚州刺史歷魏充冀三州兼河北
按察使遷幽州都督復為魏州而史但言歷充冀魏三
州刺史河北按察使進幽州都督而已史又載廣平為
廣州都督時郡人為璟立遺愛頌璟上疏辭讓有詔許
停而碑乃云燕公張說嘗為碑頌今燕公集中寔有此
文豈已為文而未嘗刻石歟

唐宋廣平碑側記

右唐宋廣平碑側記顏魯公撰載廣平任御史時持服于沙河縣屬突厥寇趙定州河朔亮懼邢州刺史黃文軌投艱于公以父母之邦金革無避及賊至城下公為曉陳禍福其徒有素聞公威名者相率而去之開元末安西都護趙含章冒于貨賂多以金帛賂朝廷之士九品以上悉皆有名後節度范陽事覺有司以聞玄宗將加點責公一無所受乃進諫焉玄宗納之遂御花萼樓一切釋放舉朝皆謝公衣冠儼然獨立不拜翌日玄宗謂公曰古人以清白遺子孫今卿一人而已公曰含章之賄偶不及臣門非不受也玄宗深嘉之又云公第八

子衡因謫居沙州叅佐戎幕土蕃入寇陷于賊庭素聞
太尉名德曰唐天子我之舅衡之父舊賢相也其可徧
乎大曆十一年以三百騎盡室護歸此皆廣平逸事有
以見其清德冠當世威名動夷狄如此而新旧史皆不
載故併錄之于此俾覽者傳焉

唐放生池碑陰記

右唐放生池碑陰記唐自天寶以後紀綱廢壞職官之
濫不可勝載此記具列當時僚屬名氏凡團練副使別
駕四人同團練副使一人長史三人司馬三人錄事叅
軍三人司功司倉司兵皆一人司法司戶皆三人司田

司士皆二人叅軍四人烏程縣令一人丞三人主簿一人尉四人長城縣令一人丞三人主簿一人尉五人安吉縣令一人攝令一人丞二人主簿一人尉六人武康縣令一人丞三人主簿二人尉四人德清縣令一人丞二人主簿一人尉三人一郡而吏貲猥多如此然史不能盡記故詳錄之于此焉

唐滑臺新驛記

右唐滑臺新驛記李勉撰李陽冰篆其陰有銘歐陽公云不知作者為誰余嘗攷之乃舒元興玉筋篆志後覽其文載于唐文粹及元輿集中歐陽公偶未嘗見之尔

唐右僕射裴遵慶碑

右唐裴遵慶碑唐書列傳載遵慶所歷官甚簡畧以碑考之其尤著者自吏部郎出為濛陽太守貶符陽郡徵拜
礼部郎中而史不載肅宗朝拜給事中累遷尚書右丞
兵部侍郎再授吏部而史但言為吏部侍郎而已又史
云遵慶薨時年九十餘碑云年八十五碑云遵慶謚貞
孝而史無之皆其闕誤也

唐杜濟墓誌

右唐杜濟墓誌但云顏真卿撰而不云書歐陽文忠公
以謂非魯公不能為也蓋世頗以為非顏氏書更俟識

者辨之余觀此誌字畫奇偉決非他人可到歐陽公信
小字麻姑仙壇記以為真蹟而尚疑此誌何哉

唐重摹延陵季子墓刻

右唐吳季子墓刻自唐以來相傳為孔子書大曆中肅
宗再模而刻之余覽史記家語及秦漢以前諸子凡孔
子與學者談議問答是非褒貶纖悉必載其間荒誕之
說實非出于聖人而附託書之者固有之矣況于季子
之賢孔子親銘其墓不應畧不見稱于_前世至唐而始傳
也又碑銘始于東漢孔子時所未有而其字畫乃故為
奇恠以欺眩世俗者非孔子書無疑蓋好事者偽為尔